

李恕谷先生年譜

冊下



李恕谷先生年譜卷四

清苑馮 辰纂

武進惲鶴生校

孫錯

重修

乙酉年四十七歲

儀功如常。智仁聖義忠和。時時自考。有一得否。孝友睦嫺任卹。隨遇勉行。主敬而用以寬和。禮樂射御書數。有力即習之。倡明聖道。接引來學。二月鄆城役來。請先生南行。偕三弟培往。語三弟以身隨時而動。心無時不靜。思幼者以動爲樂。老者以靜爲安。靜坐者。衰世之學也。祥符教諭齊愉韓石。以大學辨業爲是。來拜問學。十六日。至鄆署。覺署事變。思不能待小人。吾之過也。又思神叢借人。何廕之休。宜去。辭行。主人苦留。選訂習齋記餘。陳留令許不棄來拜。邀過其治。過西平。與趙澄溪論政。思敬和謙大。益修鳩工。刊習齋存性存治存人三編。益修餽金。製夏衣。辭之。鄆陵

魏膚功來拜、問學。答之、贈以贐。抱疾。語三弟曰、德之主在仁、而用在智。無智則德無用矣。故論語終以三知、中庸四德首以聰明睿知、孟子贊孔子大成、獨推其智也。

教諭暢泰徵聞先生將行、請筵問學。四月二十一日、力辭行。益修餽贐、命役騎送歸。

過羅寨、拜魏膚功。過陳留、與許公論政、其邑孝廉馬懋德來拜、論學。王次峯弟子

也。過祥符東、林柳王秉公來拜、問學。一路疾、不食、行自如。抵里、知從兄萃生、以

前月卒、哭之慟。犒來役、令回、疾漸愈。先生以家口衆、思儀禮同居異宮、令人得展

其私親也、其義甚是、後儒不明此義、艷稱數世不分、至于宗族數百口同食、夫同食而

使各有私財、則與析箸無異矣、若使無私財、而財司于家主一人、則惟家主得孝其親、

慈其幼耳、家之老少若干、或衣或食、或疾病藥餌、必不能盡白家主、家主即公且明、必

不能盡遂其私、以致子不得孝親、親不得慈子、兄弟夫婦、不能問恤、怨歎疾咨、非細故

也。況庸情人衆、推諉不必勤、膜視公物必不儉、甚至攘公爲私、則壞品敗爭。張公藝書

忍字百餘、其家之蓄戾漓叛可想矣、是尙謂之美乎。古有南宮氏、北宮氏、謂士大夫同

居異宮者也。若天子諸侯子壯出分，實爲定禮矣。鶴按內則命士以上，父子異宮，百姓一家過八口，則別授井田，是貴賤皆分也。辰館亂窩，先生遙贈訟過則例，辰遂上書問學。辰齋宿來拜問學。先生教以約心力行，學經濟。命立日記。修習齋年譜。七月，思先人泣下。語諸弟曰：父子兄弟同居異宮，古禮也。今人口衆多，養缺教失，立見可虞。今使汝等分居，各自力業，以習勤儉，燕客禮儀，餽遺祭享，皆我應各善爲之。辰立日記來質學。先生評之甚喜。出日譜令辰評。又以辰進規，學習齋力行古道，更喜曰：從今相我，吾道庶不仆矣。思吾自二十二歲志聖學，學躬行，學經濟。二十七歲後，出館四方，漸通世事。四十知操存心性，立定擔荷聖道，廣結名流，學乃博。今得樞天，或天不墜此道乎？成之予之責也。辰按先生期辰至遠大，奈辰遲鈍，于經濟甚遠，恐未能副也。然不敢不勉，以求得先生之一體，亦可耳。八月，齋戒如楊村，致顏先生公祭，後非出遊，二八月爲常。思人不附，非褊則刻。思莊敬，竦起。又思人偏則愚，故大學戒有所習恭。思天人相與之際甚矣，人而自褻，是褻天也，敢不畏乎？行中規矩。辰質

學先生曰：先人言心如剝蕉。顏先生言心時時起漚。子力學行，心常在道矣。自此涵而勿強，養而勿息。時以天理澆灌乃心，人欲自息。因之天理日新，世故人情日析，則學可進，德可成。勉之。

率辰習士相見禮。辰問謙敬和事親長之容乎？先生方食不語，旣而曰：非也。洞洞屬屬如執玉，奉盈婉容愉色，事親之容也。垂佩而立，頽躬而坐，翛翛恂恂，黜賢去智，事長之容也。若夫旣敬且和，抑然以謙，此待朋友同等之容也。

九月，告先祠，命諸弟析箸朔望拜獻家祠，侍母，同諸弟子侄餞，後爲常。家務蝟集，心不雜。

曰：家無實不祥，不祥之實，聽婦言者當之。思履危途而視若坦，愚也。志不強，弱也。皆過也。

擬事母下氣怡聲，失則書。思人急迫，我寬裕；人銖兩，我遍覆，乃可言學。思晝有得，夜有思，近頗不愧。而入廁搔癢，不忘敬，未若戊寅年也，愧之。

辰間七出而值三不去，何以待之？曰：待之各不同，有仍待以夫婦禮者，有夫婦禮絕，直養之終身者。

十月，先生以辰比過法佳，因自勘，促暴躁急，瑣碎，詈人，自恕，入內不莊，立跛坐倚，八過朔望比之。

率弟益溪閻季伯及辰，習祭禮三度。纂祭禮，一家祠，二所祭，三主室室。

四神主位次、五家祠公祠、並立、六祧主不祧主、七祧、八生母祔祠、九主祭、十公祠、以族長、而襄以賢以貴以富、十一時祭、十二薦、十三齋戒、十四薦儀、十五灌酒焚蕭脂、十六楮幣、十七歌樂、十八朔望謁薦、十九薦新、二十節令、二十一出入告、二十二居喪不廢宗廟祭、二十三程伊川冬至立春季秋三祭之訛、二十四文公家禮忌祭之訛、二十五五祀、二十六先聖先師、二十七社、二十八司命、劉心鏡、劉發璋、從遊、館于王家營、率習仁讀小學。每臥服膺、小心翼翼、昭事上帝。思好與人深言者、無經濟。思人不爲聖、祇是苟且、苟言苟行苟安、一時苟焉自待皆是也。思念茲在茲、有念之存養也、釋茲在茲、無念之存養也、名言茲在茲、言之存養也、允出茲在茲、行之存養也、所謂心在也、作詩曰、安得兢兢不日加、臨深履薄更無涯、無端嗜慾離弦弩、自具中和上岸車。日三復之。語三弟曰、有事可以驗學、乃反忘學、恥也。思遭心喪、樂將忘矣。禮曰、大功誦、乃將舊歌低聲誦之。臥容肅。思身爲天下萬世之身者、不以前得失動其心。聞母病、目旋視、心如割、延醫。或問佛道及文昌、曰、佛之邪言、惟有心經、他經率

劉勰僞作、老子言亦偏、而非今道教也、修煉始魏伯陽、符籙始張道陵、出家滅倫、則染佛教也、文昌乃司命七祀之一、附以梓潼帝君者、道家之妄也。辰問克伐怨欲不行及仁之辨、先生曰、不行、障決也、終日乾乾、盡力學行也、夕惕若、夜省察操存也、可無決矣、偶淤而決、長河一濬、決反安流、此求仁之道也。教辰以精神包羅闔座、及言語威儀之道。辰朔望遙拜先生、先生聞之、遙答揖。副室呂氏久病、思教以養心和平、修德盡道。思怨天尤人、必不下學、下學必不怨天尤人。先生歷聘貴顯、山珍海錯、日羅列、泊如也。歸食糠粃、即甘之。十二月、旋自館。思境蹇心和、事迫心裕。溫益修印所刊三存編至、喜之。

丙戌年四十八歲

訂一歲常儀功、日興、揖母省安、揖先聖、家人門人揖者答之、朔望率諸弟拜家祠五祀、各四拜、母四、諸弟子侄拜答揖、妻拜連叩四、答再、側拜答揖、馮樞天每日遙揖予、朔望遙拜予、辭不獲、遙答揖、三弟遙拜答揖、元旦、元宵、清明、七月十五、十月一日五祀家祠

俱薦臘月二十四日祀竈。戒二日、不飲酒、不茹葷、不弔喪、不入內、不與穢惡、不問疾、齊一日、沐浴思神。又有日齊、時齊、刻齊、謂偶有所交神、則尅期齊心也。過神祠式、或下、過祖墓下、親友墓賢者墓、或式或下、入里門下、出乃乘。日譜記言行、每時下一圈、心在則白、失言則黑圈左、失行則黑圈右、躁暴則黑圈上、慾動則黑圈下、心放則純黑。晝有爲、夜有思、瞬有存、息有養。學究禮樂兵農射御書數、隨時書。事親以順、待諸弟以和、屋漏內室必莊、小心翼翼、昭事上帝、時服膺之。守先待後、明道行道之志、勿一日寘。正月
劉明若餽公車、受其半。餽張函白養老儀。如都楊公虔齋。哭劉綽然、綽然諱有餘、京師人、習天文歷算、好交天下賢豪、四方觀光有名者、必尉傳延致、無資斧者助之、人不知其貧士也。遨遊士大夫間、羽衣芒屨、飄然如仙、六十九歲卒。哭郭子堅、爲立傳曰、郭令子堅、諱金湯、京師人也。其弟子固、識予于稠人、子堅亦篤信焉。予與二人少長各一歲、參列若弟、弟然。子堅性質直、不輕爲然諾。好潔、勤細務、井井出知桐鄉縣事、延予至、愛禮之甚厚、已歸、又延至、憂予將四十妻無子、重聘爲予置副、構留春樓以

居予、予生子彌月、奏樂設筵、乃載旋里。蒞官明于讞決、抑豪強、擊猾吏、嘗與予並轡聯輿、出勸農桑、赴薦紳席、不以官自異也。予遊西湖、訪師友、遣役齎資斧、恣所之、有過問學者、飭厨傳恐後。丁祖母艱、年四十八、遂卒。嗟乎、迴想生平情義之交、未有如之者也。其內子、四川巡撫子養志女、敦潔嫺雅、歲時以丘嫂禮相見、拜讓中節、凝如也。與子堅相敬如賓、御下無妬。予初往桐、比返、僅六閱月、子堅爲我製單複絮着、以及袒服倒頓、衲腹之屬、共六十餘襲、皆于夫人手自縫紵。及予有副、子堅戒閹曰、李先生所用布帛、果盜鍼縷米鹽諸物、有呼即應、勿關我、當未往桐時、子固軫念予後、先爲我家中置一副。予嘗語諸子曰、而世世勿忘郭氏二公也。思予生平大短曰傲、見時人非則傲生、不知時愈下、人愈非、天之禍益迫矣、尙敢傲乎。不智哉、不仁哉。吟曰、人淡我亦淡、人驕我亦驕、庸碌適相學、而以語英豪。問西洋三角算法于吳子淳。子淳曰、即句股也、而句股不如三角之密。蓋絃股之三角、二曰銳角、而句股之間曰直角、直角藏方、一定之數、故鈎三股四絃必五。三角之三角、二曰銳角、而二銳角之間曰鈍角、無定之數、故鈎

股弦不必三四五、以三四五不能盡御三角之變也。王崑繩至自廣東相見。學進氣壯、衛道甚力、喜之。崑繩述魏叔子云、考古以證今、閱事以察理、求友以自大其身、造士以使身之不死。李生敏志來拜論學、高陽相公孫也。吳次張問律呂、作律呂問示之。王太倉謂先生曰、方今翰苑乏人、僕開列主闡、若進、必中君以資館選。先生力辭之。同崑繩訪方靈臯、及戴名世。晤毛姬潢、得毛先生手書曰、南北睽隔、艱於相通、每有記憶、及思量告語者、輒掩卷太息而已。足下於禮樂大事、皆洞徹源委、發漢唐以後未發之秘、實先聖先王所繫賴一大人、不揣一日之長、實所愧心。聖道聖學、全在大學誠意、中庸誠身、論語一貫忠恕。孟子反身強恕盡之、斷勿爲宋儒主靜等說所搖惑、則直接孔孟矣。祇聖賢重事功、兼重仕進、論語節節可驗、則八股雖陋、然借此可以出身行道、努力科場、非分外事也、勉之勉之。先生復書曰、拜讀先生來教、八十四歲、猶然蠅頭細帖、核博精明、與十年前一范、知長爲斯道津梁也。許搆以禮樂洞徹原委、不敢當、至勉以誠意強恕、勿爲主靜等說所搖、敢不佩服。搆學樂書已成六卷、學禮則郊社、

禘祫、宗廟、田賦、士相見、冠昏、喪祭、各有論著、十五本之傳習。主靜等說、不敢習誤、已有剖評、具大學辨業、聖經學規纂內、今呈教。公卿自果亭匪菴外、徐大司農、極可與言、一見論學、即契合、語友人溫益修曰、李某有體有用正學也、李安溪曾以濤知律呂、達當寧、欲羅致門下、而濤拙愚竄伏、未之敢見也。海內惟王崑繩一人、初爲文人爲豪士、晚以濤言爲聖賢學、省躬改過、共肩大道。同里新得一人曰馮辰、篤行不惑、魏叔子曰、求友以自大其身、造士以使吾身之不死、不知何以無愧此言也。黃崑圃葬父、往會之。途語方靈臯曰、君疑格物非周禮之三物乎、三物之六德即仁義禮知也、六行即子臣弟友也、六藝即禮樂兵農也、請問大學之物、尙有出此三物外者乎、吾人格物、尙有當在此三物外者乎、即雜以後世文章講論、亦祇發明此三者耳、格物非三物而何。吾儒明德親民之學、乃尊于農工商、而爲士之職也。試觀宋儒用佛門惺惺法、閉目靜坐、玩弄太極、探獵性天內地、不雜於二氏乎。終日章句吾伊、經濟安在。試思伊尹割正有夏、周公制禮作樂、東征是皇、孔子擊萊墮費、以期月三年自任、宋儒學教有是乎、不過

明理尋樂、共爲獎借耳、孔孟之傳、如此而已乎、盡全體大用之道乎、士之職乎、靈臯曰、是因問治河水利弭盜、先生略言之。旋里、二月二十三日申時、抵家、呂副室辰時已

卒、入門先拜母候安、乃之其尸旁哭之。考儀禮、庶子不爲父後者、父在厭于君、其母卒

則爲權服、喪服記、所謂公子爲其母練冠麻、麻衣緦緣、旣葬除之、是也。齊王子正同此故其傳爲請加

數月父沒則大功、大功章所謂君之庶昆弟爲母、是也、爲父後者父在則總、總麻章所謂

庶子爲父後者、爲其母、是也、父沒則三年、齊衰三年章、所謂父卒則爲母是也、母兼嫡

母生母言、故下文曰、慈母如母、正指生母也、若以爲如嫡母、則慈母者側、生子而死、而

父命別側慈之者也、其恩雖深、不可以踰生我者之恩矣、乃爲服三年一如嫡母而生

母之服、反沒其文、有是理與、若曰厭于嫡而降除、則慈母亦側、獨不降除、何歟、是爲母

內、即具生母、昭然也、若大夫側子、則父在爲其母大功、父沒三年、士側子、則父在爲其

母期、父沒三年、胡安國註春秋曰禮庶子爲君爲其母無服漫無考而謬造禮如此及明太祖定禮、子爲父母、庶子爲其

母皆斬衰三年、今制因之、又考喪服小記、妾附於妾祖姑、又考喪服曰、貴妾總、喪小記

曰士妾有子而爲之總、先生乃定服總、命二子成三年服、葬於祖兆、祔于家祠。如禮。
劉心鏡復請館于王家營、劉心衡、李書思、劉心蕙、劉珙從學。作副室王氏行狀略曰、
王氏名鳳姑、杭州錢塘人、白呂者、其父出養於呂也。郭子堅爲予聘之、年十六歸我副
室、子堅字之曰素娟、寓桐鄉署西樓上、素娟日讀女要、習書刺箴、樓東退思軒時時
張燕爨弄、未嘗啓牕一覩。不花飾、嘗不傅粉、蟬鬢雲堆微髻、懶粧燕尾垂簪而已。香
囊不掛衣、摘蘭茝荊梔子亦從不插髮、或時置帷而已。夜臥必衷袒服、曉瓏璵即起。當
戊寅歲、予方著大學辨業、學樂、考禮、內存心、外省容、事、勉力窒慾、功頗密、教之見予必
起、命乃坐、朔望隨予行禮、以敬相成。抵冬、生長子習仁、次歲旋里。初居桐、熏爐、額桂花
露、曳紈被錦、厨必殺珍、果饗陳儲、而素娟三餐外、不雜食。予以比日衣食、僉賢主人供、
烏却、然糟糠汲輓、乃吾家物務也、至是盡斥錦繡、大布椎結、碾米研麵、漸米炊、與介婦
分班操作、力脆不辭。入室復學紡績、未聞一歎憤暇豫也。初歸、舟載稻米十石、子堅曰、
下媵不能北食、走餽此食之、及至家、素娟曰、鄙何得別食、同衆飯蜀秫連糠梁窩、語我

曰、不解何味、予曰、服自解、數日後、遂安之、若忘、不復言、餉糲、稻盡入公用、糴易錢、無一粒私煮食者、已而從予館肅寧、仍以班旋里司爨、生次子習中、以月間滯血、兼從前勞勩成疾、荏苒二三載、以卒、傷哉、予元配王氏甚順、素娟甚貞、而皆不永年、予無德以居之也、素娟卒年二十四、題其主曰貞懿呂氏、命侄寅虎曰習智、子隆官曰習仁、侄易

貴曰習聖、立志曰習義、子存官曰習中、

始祖諱盡忠故名以中

欲以三物教之也、使習智習仁習

小學事、

四月、張輦采舒自長安來訪、論律呂、先生以方營葬事、不能議樂、但樂學海

內乏人、今三千里來一共學者、不盡其長、後會安知、因聽其歌彈、盡其說而不辨、葬

王副室、

五月入京、以閭公度分房被譴、視之、都憲吳公匪菴請假歸、送之、匪菴餽葛

綢爲別、受之、收大學辨業學規纂板、旋過涿、板寄陳極如齋、以王副室三月卒哭、行

祔祭禮、總服闋、

習樂、

以四事自課、事親愛敬、御家莊儉、敬屋漏、謹細微、語辰曰、

宋人以即物窮理解格物、固不切、然亦未嘗即物窮理也、吾黨今日、乃即物用力耳、即如一事來前、必聖賢之心、庸人之情、豪雄之略、宵小之詭、一一照徹、始有措置、宋人所

言講書而已。其實書理即世事。世事既不透徹。書理亦必多蒙混。六月。肩輿迎太夫人于三弟館侍養。思身之不莊。即學之不振也。愧甚。爲太夫人捶背揮扇侍食。後爲常。教心衡騎射。馳馬示之。思身漸衰疲。而德不立。是吾憂也。定行前視五步。不得流及左右。失則記過。思有母可事。有子可成。天之惠也。宜無負天。七月十五。薦家祠訖。尙未明。乃假寐。李質君巡撫福建。書來候。有餽儀。受之。穫稷。借者與之。一人屢借不償。應之緩。思衆皆與。何獨拒。即與之。王崑繩來哭習齋先生。質所擬建官立學諸法。註易繫辭。辨周子太極圖之誣。辨陳搏河圖洛書之妄。辨本義筮法之非古。辨先後天圖之爲異端。辨卦氣圖之非。辨易卦配以五行之非。入京收存學編。晤江南謝野逸。金陵張天球。曉夫來拜。語以安貧守志。回里。知棗強鄭若洲。張瞻抑來拜。問學。次女歸鄭村劉氏。思人之自負才智者多自暴。自稱長厚者多自棄。可歎也。

丁亥年四十九歲

儀功如常。去瑣碎、戒暴怒、勿言人是非、待人以和、日必習恭一次。思吾心不精而粗、不一而雜、年已將衰、而德不立、愧哉。評辰日記、語以老親在堂、治生即學。同彭生琨如棗強、問學問地利、答之。抵棗強、鄭宅、若洲並其兄見百、良仲、長民、及張瞻抑、皆出問學。先生爲言今古學術之分、皆稱是。勉鄭張二子以立志學道、勿與草木同朽。三弟培之館、教以勿玷先人、勿辱顏先生、不覺泣下。李止菴請先生館于新橋、李元英等從學。王崑繩偕楊勤、慎修來拜、問學。崑繩出所著平書、分民、分土、建官、取士、制田、武備、理財、刑罰、淮黃、禮樂、辨宋明之失、以復三代、倩先生訂。慎修延先生如保定府、先生規慎修以修辭練事、慎修復具輿馬送先生及崑繩、入楊村、致顏先生二月公祭、告以平書、並告心喪已闋、思如一日。同人畢集。崑繩言平書大意曰、洗滌之乾乾淨淨、鋪排之蕩蕩平平、安置之妥妥當當、養活之歡歡喜喜、陶淑之肅肅雍雍。崑繩戲謔近放、先生規之。崑繩曰、吾意以近人也、且夙學爲豪傑、不能爲道學、承教知過矣。先生不言、夜半同臥促其床、曰、君日謂予盡言而君受言、不知予之言未嘗盡、而君亦未嘗受也。

君謂戲謔所以親人、誤也、戲謔過則爲陵玩暴虐、人且怨怒、而曰親之乎、謂爲豪傑、不爲道學、又誤也、智深勇沉豪傑也、使酒難近、豈豪傑乎、君昨謂我二人相依爲命、若不盡言、是我棄命之半也、況今海內無人、君可偏任乎、崑繩悅服。以目疾禁看書、定日轉晴七百、挽弓數十。自勸心正靜。爲諸生言取士之法、莫善于周之鄉舉里選、莫不善明之八比。清明祭、令習仁請其妣主耐食王孺人側、祭畢還殯宮。喪強車來迎、往爲若洲言主靜之非、觀其昆弟習射。三月、將母、携三子及習智侄、如新橋館。註易說卦序卦雜卦。聞李質君卒、傷之。質君長山人、諱斯義、清謹、以戊辰進士、仕至大理寺卿、巡撫福建。辰具門生刺、請正師弟禮、先生受之。辰問不藏怒宿怨、非無怨怒、不藏宿耳、曰然。遭家庭之變、而尋怨怒者、庸人也、不藏怒宿怨者、聖賢也、並無怨怒者、恕也、異端也。自勘嗜欲淡如也、然道心時有不竦立者、勉之、不然、末路祇成庸人矣。二弟五弟來視、飲之酒、殺甚快。及行、先生送之村外、佇望泣下。歸語家人曰、世有聽婦言而輕兄弟者、天地不容之人也。平董姓事、門人謂人有言、先生曰、但視事